

Koon gonz normale Sunndaach

Om letzde Sunndaach hawwe merr uns schunn gonz frieh unne om Moo getroffe, de Karl, de Schorsch unn ich, hawwe Gude gesacht, hawwe uns newernonner gestellt unn hawwe iwwers Wasser geguckt. Enn leichde Ostwind hott deferr gesorcht, dass de Fluss e bisje uffgerauht war, unn darum hott dess Gekräusel von dene kloone Welle de Widderschoi vunn de Sunn in lauder kloone, iwwer die Strömung hippende Stickscher zerleecht, so dass ess nor so geklitzert hott uffem Wasser. E paar Ende sinn um de Steech vom Ruderverein gebaddelt, awwer nor so e bisje, als wolde se on dem Daach koo Kraft vergeude.

Unn so gings unns aach, mir hawwe doo gestonne, jeder hott gradaus geguckt unn kooner hott was geredd, kooner wollt ebbes ze babbele oofonge, weil zwische uns war so ebbes wie als hätt jeder von uns e kribbelich Gänsehaut, dass kooner aach nor enn Witz oddern dumme Spruch hätt mache derfe. Mir hawwe oofach nor newernonner gestonne unn hawwe iwwers Wasser geguckt.

E Schiff iss zimlich schnell von owwe kumme, unn korz bevor dess Schiff ihn romme konnt hott enn Kormoran soon kloone Flatter zur Seit gemacht, hott de Schnawwel hoch gereckt unn iss dann gleich uff Tauchstation gonge, unn driwwe uff de onner Mooseit hawwe zwaa Kinner mett ihm Vadder e paar Stoo ins Wasser geworfe.

Erst als e Fluchzeuch von de Lufthansa zur Londung vorbeigefloochte iss, hott de Karl was gesacht: Was der Monn ferr Reise gemacht hott, hunnertvier warns!

Doch mir onnern zwaa hawwe koo Antwort gewwe, mir hawwe nor dem Fluchzeuch noochgeguckt, bisses hinner Raunem verschwunde war. Enn Radfahrer kam vorbeigesaust, enn Bub hott sein Hund gerufe unn e Audo hott de Sond knirsche losse, alses uff de Parkplatz gefahrn iss.

Doo sacht de Schorsch: Dess war enn gonz Große!

De Karl unn ich hawwe nor genickt, hawwe koo Antwort gewwe unn uns noch nittemol oogeguckt. Driwwe iss e Fraa mett ihrne zwaa Hunde um die Wett gelaafe, de Kormoran iss flach iwwers Wasser dem Schiff noochgefloochte, enn Rab hott gekrische.

Dann habb ich gesacht: Unn mir hawwen erlebt!

Ja, hott de Schorsch wie zu sich selbst gesacht, dess war enn gonz Große unn mir hawwen erlebt!

Doodenooch hawwe merr uns oogeguckt, hawwe uns zugenickt unn sinn alle drei wie uff Kommando vom Wasser eweg gonge.

Moi Boo sinn so schwer heit, habb ich vor mich hiegeflistert.

Ich habb schunn e Koppwiehablett genumme, hott de Schorsch gebrummelt.

Aach emm Karl soi Stimm hosde kaum geheert: Ich hadd heit moie iwwerhaupt koon Hunger. Ess iss halt koon gonz normale Sunndaach.

Eiern Honnes